



Siumut sinnerlugu Inatsisartunut ilaasortaq
Kristian Jeremiassen
-/ MAANI

Qeqertarsuup Tunuani ilaasunik angallassineq pillugu § 37 naapertorlugu apeqqummut nr. 2012-241-imut akissut

16. november 2012
Sagsnr. 2012-075299
Dok. Nr. 1067850

Asasara Kristian Jeremiassen

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Apeqqutitut nassiussannut qujanaq. Taakkununga akissutit matuma kinguliani takuneqarsinnaapput.

1. Sooruna Qeqertarsuup tunuani najugallit kujataamiunit angalaniraangamik akisunerusumik akiliisassasut angallanermut isumaqatigiissut nutaaq malillugu?

Nutaamik kiffartuunneqarnissamik isumaqatigiissuteqartoqangilaq. Kiffartuunneqarnissamik isumaqatigiissut pineqartoq isumaqatigiissummik atuuttumik ukiunut 2013-imut aamma 2014-imut sivitsuineruvoq. Kiffartuunneqarnissamik isumaqatigiissutip sivitsorneqarnerani uku marluusut iluarsineqarput.

- Siunissami Qeqertarsuup Tunuani piffissaq timmisartuussiviusartoq sivitsorneqassaaq, taamaalilluni ukiuunerani decembarip ulluisa aallaqqaataani aallartittarunnaarluni, novembarip ulluisa aallaqqaataani aallartittalissalluni, kiisalu upernaakkut maajip ulluisa 15-anni naasarunnaarluni, maajip ulluisa aallaqqaataanni naasalissalluni.
- S-61 Bell 212-imik taarserneqassaaq, taamaalillunilu timmisartuusseriaaseq eqaannerulissaaq.

Tassalu Qeqertarsuup Tunuani bilitsit akiisa Kalaallit Nunaata kujataanut naleqqiullutik qaffasinnerunerineritut isumaqatigiissutip allanngornera peqquaanngilaq.

Kisiannili Kalaallit Nunaata avannaani bilitsit Kalaallit Nunaata kujataanut naleqqiullutik akisunerummata ilumoorpoq, tamannalu matuma kinguliani takussutissiami takutinneqarpoq:

Distrikki	Kiffartuunneqarnis-samik isumaqatigiisummut akiusoq (ukiumut kr.)	Ilaasut (amerl.)	Bilitsimut akit agguaqatigiisillugit (kr.)	Bilitsimut ataatsimut tapiissutit (kr.)	Aningaasartuutiviusut tunngavigalugit bilitsimut akiusoq (kr.)	Bilitsip akianut tapiissutit annertus-susiat.
Qeqertarsuup Tunua – ukiuunerani (qulimiguulik)	13.389.000	5.959	894	1.604	2.498	64 %
Qeqertarsuup Tunua – aasaanerani (angallat)	6.200.000	12.060	259	505	764	66 %
Kalaallit Nunaata kujataa	22.500.000	39.546	419	494	913	54 %

Takussutissiami Kalaallit Nunaata kujataani ilaasunik angallassinermut akit Qeqertarsuup Tunuani akinut assersuunneqarput. Tassani takuneqarsinnaavoq bilitsimut ataatsimut tapiissutit nalinginnaasut ukiuunerani Qeqertarsuup Tunuani, angallassinerep tamarmiusup qulimiguulik atorlugu ingerlanneqarfiani qaffasinnerujussuusut, kiisalu aasaanerani Qeqertarsuup Tunuani bilitsimut ataatsimut tapiissutit, ukioq kaajallallugu Kalaallit Nunaata kujataani bilitsimut ataatsimut tapiissutinit qaffasinnerularluni.

Qeqertarsuup Tunuani ukiuunerani aasaaneranilu angallassinermut tapiissutit Kalaallit Nunaata kujataani tapiissutitut naleqqiullutik 10 aamma 12%-inik qaffasinnerupput, taamaattumillu aamma Qeqertarsuup Tunuani Kalaallit Nunaata kujataanut naleqqiullugu bilitsimut tapiissutit annertunerusarput.

Tassalu Qeqertarsuup Tunuani angallannermut nammineerluni akiligassat koruuninngorlugit oorinngorlugillu amerlanerusarput, tassani timmisartuussinermut aningaasartuutit qaffasinnerummata, tak. aningaasartuutiviusut tunngavigalugu bilitsinut akit. Aammattaaq Qeqertarsuup Tunuani Kalaallit Nunaata kujataanut naleqqiullugu ilaasumut ataatsimut tapiissutit koruuninngorlugit oorinngorlugillu qaffasinnerummata eqqumaffigissallugu pingaaruteqarpoq.

Kiisalu Kalaallit Nunaata kujataani ilaasutigut tunngaviusut Qeqertarsuup Tunuanut naleqqiullutik amerlanerupput: 2011-mi Kalaallit Nunaata kujataani ilaasut 39.546-uusimapput, kiisalu Qeqertarsuup Tunuani ilaasut 18.019-iusimallutik. Ilaasut ikiliartortillugit aningaasartuutit amerlanerunerusarput, taakkunungalugu ilaasumut ataatsimut nammineerluni akiligassat ilaapput.

2. Periarfissaqarpa Qeqertarsuup tunuani akikinnerusumik angalasalernissaq eqqarsaatigalugu aaqiissuteqarnissamut?

Pisortat tapiissutaasa amerlassusii, nammineerluni akiligassat, assartuusseriaaseq kiffartuunneqarnerullu qaffasissusia tunngavigalugit bilitsimut akit aalajangerneqartarput. Tassalu innuttaasut akikinnerusumik angalassappata, Namminersorlutik Oqartussat

tapiissutaat amerlineqartariaqarput, assartuusseriaaseq allanngortinneqartariaqarpoq, imaluunniit kiffartuussinerup qaaffasissusia appartinneqartariaqarpoq.

Timmisartuussinermut aningaasartuutissat aalajangersimasut amerlammata, assersuutigalugu tikittartut ikilinerisigut sipaarutissat qaqutigunnaq kiffartuunneqarnermi ajorseriaatsinut, innuttaasunit misigineqartartunut naapertuuttarput.

Assartuusseriaatsini imaatigut angallassineq timmisartuussinermit akikinneruvoq. Kisiannili Qeqertarsuup Tunuani ukioq kaajallallugu imaatigut angallassinerup atorneqarnissaa ajornarpoq. Tamatuma saniatigut piffissaq timmisartuussiffiusoq ullunik 14-inik sivitsorneqarpoq, innuttaasunit piffissami sivilunerusumi timmisartuunneqartarnissaa kissaatigineqarmat.

Tapiissutit amerlineqarnissaannut tunngatillugu aningaasaqarnikkut sinaakkutissat, aningaasanut inatsimmi kontomi 73.01.08, aalajangerneqartut tamakkiisumik atorneqartarput, taamaattumillu aningaasaliissutit atuuttut atorlugit amerlanerusunik tapiissuteqarnissaa ajornarpoq.

Taamaattumik maannakkut sinaakkusiussaasut/tulleriarinerit iluanni Qeqertarsuup Tunuani innuttaasut akikinnerusumik angalasinnaalernissaanut aaqqiissutissatut siunnersuuteqarnissaa ajornarpoq.

3. Qeqertarsuup tunuani sila ajortillugu imaluunniit timmisartooq aallanngitsoortillugu ilaasut aallanngitsoortut unnuinissamut akiliunneqartassappat?

Air Greenland angalanermut tamarmut isumaginnittuussaattillugu, angalanerlu nunaqarfimmiit pisussaattillugu, ilaasussaaq piffissami kinguaattoorfiusumi takkussimagaluartooq inissinneqarnissaanik isumaginninnissamut pisussaaffeqanngilaq. Nunaqarfiit amerlanerpaartaanni akunnittarfeqannginera assigisaanilluunniit Air Greenlandip ilaasunut inissiivigisinnaasaanik peqannginnera tamatumunnga pissutaavoq. Taamaattumik sillimmasiisarnermut aaqqissuussineq taamaallaat sumiiffinnut, pisortatigoortumik inissiivissaqartunut atuutsineqarpoq. Isumaqaatigiissutip atsiorneqarnerani naliliisoqarpoq, ilaasussat nunaqarfimmit aallartussat amerlanerpaartaat namminneerlutik tassani najugaqaramik, imaluunniit ilaqtaminnut ikinngutiminnulluunniit tikeraarsimagamik, taamaattumillu timmisartup timmisartuusseqqinnissaata tungaanut annertunerusumik aningaasartuuteqaratik taakkununga inississinnaanissaa naatsorsuutigineqarmat ajornartoortassanngitsut.

Disko Line aamma Arctic Umiaq Line angallavimminni taamaatitsisoqartillugu, pisortatigoortumillu inissiivissaqartooqartillugu, inissiinissamik isumaginninnissamut pisussaaffeqarput.

Kisiannili Disko Line imaluunniit Arctic Umiaq Line kinguaattuuginnarsimatillugit, taamaattumillu Air Greenlandimi timmisartumut inortuisoqartussanngortillugu, Disko Line, Arctic Umiaq Line imaluunniit Air Greenland timmisartumut bilitsimut unnuinermulluunniit matussusiinissamut pisussaaffeqanngillat. Aamma Disko Line-mut ilaanermut, aammalu Arctic Umiaq Line-mut imaluunniit Air Greenlandimut ilaalluni ingerlaqqittussaannermut maleruagassat taakku atuutissapput.

Neriuppunga matuma siuliani akissutikka apeqquinnut tamakkiisumik
akissutaasimassasut.

Inussiarnersumik inuulluaqqusillunga

Jens B. Frederiksen